

Regional News Unit AIR Aizawl
Monday, September 02, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Tun hnai khan Saitual district-ah Myanmar atanga raltlan mi 32 an lut a, heti hian Mizorama Myanmar raltlan awm zat chu mi 33,756 an tling ta.
- African Swine Fever vawk pulhri leng mek avangin kuminah Mizorama vawk sing 2 chuang suat a ni tawh.
- President Draupadi Murmu-i chuan court-a thubuai chinfel loha inchiah rei lutuk tihlem chu hmabak pawimawh tak a ni a ti.
- Union Home Ministry chuan Gujarat-a tuilian avanga chhiatna thlengte zirchiang tur Inter Ministerial Centreal Team a din.



REFUGEES

Tun hnai khan Saitual district-ah Myanmar atanga raltlan mi 32 an lut a, heti hian Mizorama Myanmar raltlan awm zat chu mi 33,756 an tling ta.

Home department thuneitute hnen atanga thu dawn danin tun hnai a Saitual district a lut thar ni a district thuneitute'n an chhinchhiahte hi mipa 8, hmeichhia 5 leh naupang 19-te an ni a. Saitual-ah hian relief camp a awm loh avangin an chhungkhat lainate leh thiante an bel ni a thudawn a ni a. Hetih lai hian chi leh chi inchemharna avanga Manipur atanga sahimna zawnga Saitual district a awm mek hi mi 906 an ni a, mi 89-te chu relief camp 5-ah dah an ni a, a dang zawng chuang chhung khat laina leh thiante an belh loh pawhin in luahin an khawsa a ni.

Tuna sahimna zawnga Mizorama awm mek Myanmar raltlan 33,756 zinga 10,167 te hi mipa an ni a, hmeichhia 10,805 leh naupang 12,784 an awm bawk. An zinga mi 16,969 te chu district 7-a relief camp 129-ah awmin a dang mi 17,787 te chuan lainate leh thiante an bel a, mi in luaha khawsa an awm bawk.

District malah chuan Champhai district-ah Myanmar raltlan tam berin mi 13,966 zet an awm a, an zinga 6,333 te chu relief camp 18-ah dah an ni a, mi 7,633 te erawh chu relief camp pawnah an awm thung. Siaha district-ah relief camp tam berin 41 lai a awm a, raltlan mi 5,953 zinga mi 4,453-te chu relief camp-ah hian awmin a dang mi 1,500 te chu relief camp pawnah an awm thung a ni. Raltlan ngah ber pathumna Lawngtlai district-ah mi 5,922 an awm mek a, relief camp ngah ber pathumna niin 38 an nei a, chutah chuan raltlan 4,026 awmin pawn lamah mi 1,850 an awm bawk a ni.

Union Home Minister Amit Shah-a'n an ram a ralmuan hma chuan Myanmar atanga Mizorama raltlan lo lutte hi thawnkir luih an nih dawn loh thu chief minister Pu Lalduhoma a rawn hrilh ni a sawi a ni a. Tun mai-ah hi chuan an kirna ni khua a la lang rih lo niin a lang.

<><><>

GINGER

ZPM sorkarin kuthnathawktute thar chhuah man man zawka hralh tura inthlan hma leh an sorkar hnu a thu an tiam avangin kumin hian sawhthing quintal nuai 11 thelh thar beisei a ni.

Horticulture department hotute hnen atanga thu dawn danin kumin hian chhungkaw 25,102 chuan ram acre 27,608 point 528 a zau-ah sawhthing quintal nuai 1, sing 6, sang 8, 583 leh kg 298 an ching a. An thar chhuah theih zat tur hi quintal nuai 10, sing 9, sang 3 leh 299 vel ni a chhut a ni. Hetih lai hian sawhthing a tam nasat avangin sawhthing chingtu tam takin harsatna an tawk mek a. Hetianga kumina sawhthing ching chhungkua leh sawhthing chin a lo pun tak chhan hi sorkarin a hralhna a hmuhsak dawna an rin avang leh sawhthing man a tlak hniam pawh a, sum an hloh lohna tur atana sorkarin sum thawhsak a tiam vang niin a lang. Hetih lai hian kumin hian sawhthing a tam nasa hle a, hemi avang hian kuthnathawktute hian an thawh rah ang an seng lovang tih an hlau hle. August ni 16-a horticulture department hnena report lut atanga a lan danin sawhthing chingtu chhungkaw 25,102 zinga chhungkaw 6,568 te sawhthing chinna ram, khaw 236 chu sawhthing tam hian a khawih mek a ni.

Sorkarin sawhthing tam do tura August ni 16 atanga beihpui a thlak tan 'Operation Ginger 2024 - Fehchhuah Runpui' -ah chuan Nilaini thleng khan khaw 367 a sawhthing chingtu mi 5,376 te hnenah zirtirna pek a ni tawh a ni. Horticulture minister Prof. Lalnilawma chuan Fehchhuah Runpui hi kalpui mek a nih thu a sawi a, hnathawktu indaih lo chung pawhin August thla chhunga zawhfel tum a nih thu a sawi a ni.

Sorkarin 'Bana kaih' ruahmanna hmanga thlai chingtute puih a tuma kal mekah sawhthing bakah thlai dang pawh kumin hian chingtu an pung niin horticulture department hotute chuan an sawi a. Aieng hi chhungkaw 3,415 chuan ram acre 4,282 point 6-ah quintal 7,817 leh kg 155 an ching a, thar chhuah an beisei zat chu quintal 81,609 leh kg 9 a ni. Chutiang bawkin hmarcha te hi chhungkaw 8,687 zetin ram acre 11,831 point 42-ah quintal 585 chu kumin hian an ching a, quintal 37,929 leh kg 457 thar an inbeisei a ni.

<><><>

DISASTER

Ruah a sur tam avangin Mizoram chhung hmun hrang hrangah chhياتna a thlen belh a.

Aizawl-ah chuan Vaivakawn Zohnuaia Pu Sangthanmawia in chu a chim a. Hemi avang hian chhungkaw 23 chu hmunhim lamah suanchhuah an ni.

Vaivakawn Zohnuai Primary School hnuai-ah lei a min nasa hle a, Zohnuai kawngah hian Sabereka-khuangkaih a nasa hle bawk.

Puan tawh angin Hunthar Govt. M/S bul chu nasa taka a chet belh avangin he kawng hi lirthei zawh atan a him tawh lova, chhiatna nasa zawk thleng thei laka mipui leh lirthei khalhtute an him tlan nan Hunthar Govt. M/S bul kawng chu khar rih a ni.

Kulikawn leh Saikhamakawn inkar kawngchhak lei a min bawk a, Ainawn veng Pu Biakenga in a khi nasa hle a. Hemi avang hian Pu Biakenga te chhungkua tiamin chhungkaw 3 chu hmun him lamah sawn chhuah an ni a.

Kolasib district-a Rengtlangsang bula leimin avangin Aizawl leh Silchar inkar kawngpui a ping a. PWD chu leimin thianfai tur hian hriattir an ni tawh a.

Serchhip district-a Khawbel-ah leimin engemaw zat a awm bakah Leisang-ah leiminin kawng a hnawh a, Chhingchhip leh Hualtu inkar kawng a ping bawk a ni.



NIA CHARGE SHEET

National Investigation Agency (NIA) chuan Ningani kal ta khan Myanmar lama ralthuam tawlh ru thin ni a puh mi 10 lakah Aizawl a NIA special court-ah charge sheet an thehlut.

NIA thuchhuahin a tarlan danin ralthuam leh puak thei thil dang man chungchanga an charge sheet te hi Lalrintluanga, Laldinpuia, Zoremsanga, Lalbiaktluanga, Lalrinsanga, Zothanmawia, Henry Siangnuna, J Rohlpuia, Laldinsanga leh David Lalramsanga te an ni a. Indian Penal Code, Arms Act leh Explosive Substance Act section hrang hrang tlawh chhana thubuai siamsak an nih angin charge sheet hi court-a thehluh a ni. Hemi chungchangah hian kum 2022 May thla khan thubuai ziah luh a ni a, hei hi Kelsih khaw dai a lirthei pahnih atanga puak thei thil, silai leh a mu thahnem tham tak man a nih avanga ziahluh a ni a, lirthei a chuang mi 4-te chu man an ni. NIA-te'n an chhui chhuah dan chuan Myanmar mi an ram chhung leh Mizorama an thawhpuite nen sipai sorkar dotu pawlte tanpuina atan ralthuam an lei khawm thin niin an sawi a. Aizawla awm mek Myanmar mi Lalrinsanga leh mi engemawzat, Myanmar mi leh Mizoram mite chu intiam rualin Myanmar a sorkar dotu pawlte tan ralthuam an thawnlut thin a ni, an ti bawk.

Lalrinsanga hian puak thei thil kawh leh zawrh phalna nei David Lalramsanga leh C Laldinsanga bakah an sangawi zawnpui Lalbiaktluanga leh Zothanmawia te chuan Myanmar rama thawn chhoh turin ralthuam puak thei thil tam tham tak an la khawm niin NIA chuan an sawi a, midang hemi chungchanga an chhui mekte pawh Myanmar sipai sorkar dotute hnena ralthuam thawn chungchangah hian an inrawlh niin an sawi bawk. Aizawla ralthuam zuartute pawh he thilah hian inrawlh Myanmar mi Mizoram rawn tlawhte hnenah ralthuam an hlan thin niin NIA chuan an puh a. Ralthuam an man a batch number leh QR inbel atanga a lan danin an ralthuam thenkhat chu Guwahati a puakthei thil zuartu Albarin Explotech hnen atanga lak niin a lang tih NIA te hian an sawi a ni.



ASF UPDATE

African Swine Fever vawk pulhri leng mek avanga kumina Mizorama vawk suat zat chuan 20,000 pel tawhin nimin thlenga vawk suat zat chu 20,033 a tling tawh.

Nimin khan vawk pulhri leng avang hian vawk 44 a thih belh leh a, vawk 58 chu he vawk pulhri darh zel tur venna atana suat a ni bawk a. Vawk thite hi Lunglei, Serchhip leh Hnahthial district amite a ni a, vawk suatna hi Aizawl, Lunglei, Serchhip leh Hnahthial district-ah te a ni. Kumin February ni 9 khan Champhai district-a Leithum khua a vawk thi chu ASF vawk pulhri vang a ni tih finfiah a ni a, heta tanga nimin thleng hian vawk 11,493 a thi tawh a. Animal husbandry and veterinary department hotute chuan tunah hian khaw 219 chu vawk pul hri lenna khua-ah an puang a ni.

Hetih lai hian tun hnai a Bungtlang South khaw bul De lui kama sanghal 17 lai ruang hmuh chu ASF vawk pulhri vanga thi an ni em tih enfiah turin Vety leh Forest department lam mite a hmunah an kal a. Vety department hotute chuan an chanchin chiang taka an la hriat theih rih loh thu an sawi a ni.



GRAPE WINE

Champhai District-a Tlamsam leh Hnahlan khua a Grape tuisawrna, (Winery)-ah tunlai hian Grape rah lei mekin, an lei khawl ang ang te an sawr nghal zel.

Member 133 awmna, Champhai Grape Growers Society chuan kumin July ni 9 atang khan grape rah an lei tan a, tun thleng hian quintal 1,202 vel lei tawhin kum dangah chuan an member ta chauh lo pawh an lei laiin kuminah chuan an member ni lo, grape rah lei sak tur an awm meuh lo. Kum kalta khan grape rah quintal 1,069 leh kg 6 lei khawlin Kg khat Cheng 60 hisap in an la a; grape rah an lak te hi an lak ni la la-in an sawr nghal tlangpui a ni.

Champhai Grape Growers Society hruaitute hnen atanga thu dawn danin, kum kalta a grape an lak, a tui sawr sate chu pakhat mah dehral a la ni lova, grape tui sawr sa litre nuai khat vel an la kawl mek a. Hetihlai hian Baptist Church of Mizoram in Sakrament atana an lei sak erawh Inremna thuthlung awmsa angin hralhchhuah a ni a, anni hian kum khatah Case 200 vel an lak sak thin a ni.

Champhai Tlamsam a Winery atang hian Champwine pangngai hi ml. 750 leh 375 ml. ang siam a ni a, Champwine Premium hi ml. 750 siam a ni. Sacramental Wine hi ml. 750 siam a ni thung a. Vendor te kal tlangin heng wine te hi hralh a ni a, hetihlai hian Sawrkar atanga phalna (Licence) nei ve si lo, mimal wine chi hrang hrang siamchhuak ve an awm nual avangin Champhai Winery atanga siam chhuah wine te hi Vendor ten an hralh chak loh phah niin grape chingtu pawl hruaitute hnen atanga thu dawn a ni.

Hnahlan Winery ah pawh July ni 17 atang khan loneitute tharchhuah grape rah an lei tana, Kg. khat cheng 60 zel hisapa leiin vawiin thleng hian quintal 830 vel leikhawl tawh a ni a. An lei ang angte chu a tahtawla sawr nghal zel a ni bawk. Member 200 vel awmna Hnahlan Grape Grower Society hian winery atanga an siam chhuah Isabella an tih hi vendor-te kaltlang chauhin an hralhchhuak mek a, hetihlai vek hian kum kalta lama grape tui an sawr sa litre sing 4 vel hralhchhuah loh an la nei mek bawk a, vendor te chauh kal tlang lova zalen taka hralhchhuah theih an duh thu an sawi a ni.



PRESIDENT

President Draupadi Murmu-i chuan court-a thubuai chinfel loha inchiah rei lutuk tihtlem chu hmabak pawimawh tak a ni a ti. Ni hnih awh National Conference of District Judiciary, Bharat Mandapam New Delhi-a neihah he thu hi sawiin Pi Murmu-i chuan thubuai chinfel loh inchhek tam lutuk chingfel turin thawktute tangrua a, a chinfel dan kawng zawng turin a chah a. Kum 32 chuang thubuai pawimawh tak tak chinfel loha la awmte chu ngaihven turin a ngen a ni.

Prime Minister Narendra Modia chuan Inrinni khan National Conference of District Judiciary hi a hawng a. Thusawiin PM Modia chuan vantlang nunah hmeichhiate chung a hleilenna leh naupangte himna derthawng mek chu ngaihven a ngai hle a ti a. Ramchhunga hmeichhiate himna turin dan khawng tak tak zam a ni chungin tun aia uara hman a ngai a ni a ti.

Pu Modia chuan Supreme Court -in kum 75-na hmel a hmu thei chuan India hi mipui rorelna democracy hringtu ram anih zia a tilang a ni a ti. Supreme Court kum 75-na chu ram danpui Constitution zinkawng leh a hlutna tarlangtu a ni a ti bawk.

National Conference of District Judiciary ah hian Chief Justice of India Justice DY Chandrachud leh Union Law Minister Arjun Ram Meghwal te pawh an tel a. Ni hnih awh tur niin Supreme Court buatsaih a ni.



IMCT

Union Home Ministry chuan Gujarat-a tuilian avanga chhياتna thlengte zirchiang tur Inter Ministerial Central Team a din. He team hi National Institute of Disaster Management Executive Director chuan a kaihruai dawn a. Gujarat-a ruahsur nasa leh tuilian avanga mipuite harsatna an tawh hrang hrangte an zirchiang dawn a. Tuilian tuar nasa district te an tlawh dawn a ni.

August ni 25 atanga ni 30 chhung khan Gujarat hian tuilian nasa tak a tuar a. Ruahsur nasa avanga harsatna hi an thenawm Rajasthan leh Madhya Pradesh te pawhin an tuar ve a ni.

Kuminah hian tuilian leh leimin nasa vanga chhياتna thlengte zirchiang tur Inter Ministerial Team hi sawrkar laipui chuan Assam, Kerala, Mizoram leh Tripura-te tan a lo din tawh bawk a ni.

